



## Protocol

**dalla seduta dil cussegl da vischnaunca,  
venderdis, ils 13 da november 2020: allas 20.15 – 23.30  
Liug: Sala Fontauna dil Center da sport e cultura**

---

**Presidi:** Mario Flepp

**Actuar:** Paul Duff

**Presents:**

- |                            |  |   |
|----------------------------|--|---|
| a) Cussegl                 | Christoph Berger<br>Adrian Deflorin<br>Anna Maria Genelin<br>Giusep Lozza<br>Helga Probst-Linder | Stefan Columberg<br>Edgar Durschei<br>Christian Loretz<br>Armin Manetsch<br>Livio Zanetti |
| b) Suprastonza             | Robert Cajacob<br>Victor Flepp<br>Jris Lombris   | Clemens Berther<br>Wendelin Jacomet   |
| c) Perstgisas:<br>Cussegl: | Armin Berther<br>Admir Jasarevic   | Rita Huonder-Tenner<br>Martino Sabbadini  |
| d) Cumissiun<br>da gestiun | Manfred Caviezel<br>Toni Huonder   | Beat Hosang   |
| e) Canzlist<br>communal    | Andri Hendry   |   |

## **Plaid d'avertura entras il president**

Puspei dominescha il coronavirus nossa veta da mintgadi. Il virus sederasa a moda prigulusa. Per impedir in secund "lockdown" ed in debachel dil sistem da sanadad ha il cussegl federal stuiu prender mesiras pli rigurusas. A mi ei nuncapeivel che certs sabiuts vulan saver tut meglier e fan aschia encunter quellas ordinaziuns cun demonstraziuns e provocaziuns.

Cuort menziunel entgins puncts sco era damondas:

- Nua ei cheu la responsablada visavi nos confamiliars sco era tut nos concarstgauns?
- Differents spitals ein gia als cunfins da lur capacita.
- Lein nus veramein provocar ora, ch'ils miedis els spitals ston decider sur da veta e mort dils pertuccai? Lein nus veramein quei?
- Setenin nus ussa buca vid las ordinaziuns, periclitein nus era la stagiun d'unviern. Tgei consequenzas che quei ha savein nus mo s'imaginar.
- Essan nus pertscharts tgei influenza ch'in secund "lockdown" ha per nus tuts sco era per l'economia? Sa cons onns che nus murdin e pitin vid talas consequenzas?

Lein esser prompts da setener vid las ordinaziuns ed aschia evitar bia dolor e malemperneivladads. Il cussegl ha ord motivs numnai liug oz cun exclusiun dalla publicita.

Cun quels cuorts plaids fineschel miu plaid.

## **Mortoris**

Dapi la davosa seduta dil cussegl da vischnaunca dalla perioda d'uffeci 2017/2020 han ils suandonts vischins bandunau il terrester:

Sigisbert Benedikt Flepp-Manetsch, naschius ils 4 da settember 1928, morts ils 23 d'october 2020

Franziska Ursulina Genelin-Foppa, naschida ils 18 da november 1936, morta ils 29 d'october 2020

Isidor Giusep Deflorin-Venzin, naschius ils 2 d'avrel 1942, morts ils 3 da november 2020

## **Naschientschas**

Dapi nossa davosa seduta dil cussegl da vischnaunca ha ei dau treis naschientschas.

Nino Huonder, naschius ils 13 d'october 2020, fegl da Michaela ed Adrian Huonder

Nico Albin, naschius ils 19 d'october 2020, fegl d'Aurelia e Claudio Albin

Alice Gomes Araujo, naschida ils 28 d'october 2020, feglia da José Antonio Oliveira de Araujo ed Alda Daniela Da Silva Gomes

## **Tractandas:**

1. Protocol-29 - 2017/2020
2. Verificaziun dall'elecziun dalla suprastanza communal per la perioda d'uffeci 2021/2024 (messadi nr. 51-2017/2020)
3. Preventiv 2021 (messadi nr. 52-2017/2020)

Cussegl da vischnaunca Disentis/Mustér  
Il president: Igl actuar:

Mario Flepp

Paul Duff



Cussegl da vischnaunca 2017/2020  
Protocol nr. 30  
Seduta dils 13 da november 2020

---

## 1. Protocol

*Protocol nr. 29-2017/2020*

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau objecziuns ch'ei nudadas cun color blaua.

President communal Robert Cajacob:

Tier las uras da damondas sin pagina 12 manca la damonda tier la risposta sur dil stan dil project Hotel Acla da Fontauna.

Il protocol vegn cumpletaus cun la damonda dil cussegl: Co ei il stan actual tier il project dalla sanaziun Hotel Acla da Fontauna?

***Decisiun:***

***Il protocol vegn approbaus cun la midada numnada senza cuntervuschs.***

Cussegl da vischnaunca Disentis/Mustér  
Il president: Igl actuar:

Mario Flepp

Paul Duff



Cussegl da vischnaunca 2017/2020  
Protocol nr. 30  
Seduta dils 13 da november 2020

---

## **2. Verificaziun dall'elecziun dalla suprastonza communal per la perioda d'uffeci 2021/2024 (messadi nr. 51-2017/2020)**

Suprastonza:

President communal Robert Cajacob:

Ins ei satisfatgs. Ils uffecis en suprastonza ein occupai culs novs suprastonts, president communal René Epp e cun gerau Paul Flurin Schmidt. Medemamein ein ils veders eligi Clemens Berther, Wendelin Jacomet ed Jris Lombris. Tenor la constituziun communal ston quellas elecziuns vegnir verificadas dil cussegl communal.

### **Decisiun:**

***Il cussegl decida cun 11 gie, senza cuntervuschs ed abstenziuns da verificar las elecziuns dalla suprastonza communal per la perioda d'uffeci 2021/2024.***

Cussegl da vischnaunca Disentis/Mustér  
Il president: Igl actuar:

Mario Flepp

Paul Duff



### 3. Preventiv 2021 (messadi nr. 51-2017/2020)

Cumissiu da gestiun:

Conform ad artechel 54 dalla constituziun communal e dil regulativ per la cumissiu da gestiun havein nus controllau il preventiv 2021 sco era la proposta per la fixaziun dil pei da taglia. La cumissiu ha repassau il preventiv en tut ils detagls ed ha tschentau sias damondas alla suprastanza communal a caschun d'ina seduta comunabla. Per mauns dil cussegl havein nus rapportau a scret. Tuttina lein nus aunc remarcar entgins puncts:

cash-flow

Il cash-flow dad 1.2 milliuns francs ei bass en vesta allas grondas investiziuns futuras – el ei denton en rama dils davos onns. Per quei motiv fuss ei prudent da ponderar gia ussa pusseivladads d'augmentar quel. Naturalmein ei ina gronda part dallas expensas ligiadas vid leschas, contracts e cuvegnientschas. Auters cuosts ein denton flexibels e selaijan reducir. Nus lein plinavon far attents ch'in cash-flow en la dimensiun previda tonscha a liunga vesta buca da far las investiziuns senza augmentar ils deivets sin in'altezia che surpassa la limita da frs. 5'000.-- per habitont. En quei mument vegn igl uffeci da vischnauncas a suttametter nossa vischnaunca ad ina cussegliaziun pli intensiva.

Finanziaziuns specialas

La dismessa e purificaziun d'aua vegn buca finanziada cumpleinamein cun las taxas, aschia ch'il deficit sto vegnir curclaus ord il quen da gudogn e sperdita. Ei fuss plaunsiu temps d'alzar las taxas da diever e procurar che quella posiziun porta sesez.

Center da sport e cultura

Il preventiv dil center da sport e cultura preveda ina sperdita da rodund frs. 240'000.--. Quei ei en rama dils davos onns. Damai che las investiziuns ein pli bassas ch'ils onns vargai, ei il resultat dil preventiv denton menders che quels dils davos onns. Il motiv ein las entradas reducidas entras il coronavirus.

Quen d'investiziuns ed investiziuns futuras

Il quen d'investiziuns 2021 preveda investiziuns nettas ell'altezia da rodund 6 milliuns francs ed aschia in alzament dils deivets per 4.8 milliuns francs. Ina part dallas investiziuns ein gia decididas, autras basegnan aunc decisiuns legalas. Sco gia menziunau a caschun dil plan da finanzas 2021-2025 lein nus aunc inagada far attents che las investiziuns ston vegnir periodisadas ed etappadas optimalmein ed eventualmein era redimensiunadas ni schizun spustadas per mantener in bien equiliber denter las investiziuns ed ils deivets. En vesta allas grondas investiziuns futuras eis ei impurtont da tener il pei da taglia sin las entradas e la facultad tier 120%.

El num dalla cumissiu da gestiun less jeu engraziar per la buna collaboraziun cun ils differents gremis durant igl entir onn ora. Engraziel fetg!

Suprastanza

President communal Robert Cajacob:

Suenter ch'il messadi cul preventiv ei staus suttamess alla cumissiu da gestiun e repartius als commembers dil cussegl communal han las malauras digl october mussau gronds donns che han influenza sil preventiv pigl onn 2021. Plinavon ha la situaziun dil coronavirus per consequenza, che las expensas per la vischnaunca vegnan a crescer. Ei setracta cheu da donns da malaura ch'il forester ha annunziou en ina summa da ca. frs. 1'050'000.--. Da quels cuosts sto la vischnaunca quintar da stuer surprendre ca. frs. 315'000.-. Ultra da quei ha il spital regiunal da Glion giu en consequenza dil

coronavirus ina sminuaziun d'entradas da ca. 5,5 milliuns francs che vegn ulivaus per 90% dil cantun. Las vischnauncas han da surprender ils 10% restonts, ca. frs. 550'000.-- e da quels vegnan ca. frs. 55'000.-- adossai alla vischnaunca da Mustér.

Per consequenza sereducescha il cash-flow da 2021 sin frs. 893'000.-- ed il gudogn sin frs. 236'000.--. Il cussegl duei decider schebein quellas summas dueien vegnir integradas el preventiv ch'ei presentaus.

### **Discussiun:**

Cussegl:

Cto. 0110.3102.01 Stampats e publicaziuns; en vesta dallas informaziuns dil president communal ha ei num da spargnar cun spustar cumpras ni investiziuns. Daco ei tala summa dublegiada el preventiv enviers l'expensa da 2019?

Canzlist communal Andri Hendry:

Ei setracta da treis posiziuns. La gronda ei la publicaziun dil rapport annual dalla vischnaunca da frs. 10'000.--. Lu dependa ei contas votaziuns dil pievel all'urna che succedan en in onn. Per quei material da votar (messadis, cedels da votar, porti) ei previu la summa da frs. 9'000.--. Plinavon ei reservau per la sentupada culs novs votants la summa da frs. 1'000.--.

Cusseglie Edgar Durschei:

Biaras informaziuns che vegnan repartidas a scret savessan oz succeder sin via electronica. Quei ei il cass tier formulars e publicaziuns. **Jeu fetg la proposta da scursanir l'expensa da frs. 20'000.-- sin frs. 15'000.-- el preventiv 2021.**

### **Decisiun:**

***Il cussegl decida cun 9 gie e 2 na da scursanir l'expensa dil conto 0110.3102.01 "stampats e publicaziuns" el preventiv 2021 sin frs. 15'000.--.***

Cussegl:

Cto. 0210.3090.00 Scolaziun e formaziun; la summa ei dublegiada enviers il quen da 2019. Tgei ei il motiv?

Canzlist communal Andri Hendry:

Ina emploiada dall'administraziun communal frequenta actualmeins ina scolaziun dil fatg per fatgs da personal. Sco usitau surpren la vischnaunca ina part dils cuosts da scolaziun cun obligar che la persuna resti engaschada silmeins aunc treis onns suenter la finiziun dalla scolaziun.

Cussegl:

Cto. 0210.4611.01 Indemnisaziun per uffeci da finanzas; l'entrada el preventiv 2021 sereducescha per rodond frs. 20'000.--. Han ins fatg retschercas tier la vischnaunca da Medel per schar taxar e trer en las taglias da vischnaunca entras igl uffeci da taglia da Mustér? Quella lavur manteness plazzas ella regiun.

Canzlist communal Andri Hendry:

La summa totala dils dus contos 0210.4611.01 Indemnisaziun per uffeci da finanzas e 0210.4612.00 Provisiuns d'incasso sereducescha buc. Egl onn proxim ei previu da cudischar la provisiun pigl incasso dallas taxas turisticas sil correct conto 0210.4612.00. Nus essan en contact cun las vischnauncas dalla regiun concernent in'eventuala alianza dils uffecis da taglia. Dil mument ch'il cantun mida il sistem da taxar tenor la aschinumnada "Fallpauschale", duei vegnir fatg tut il pusseivel da mantener la lavur da taxar vinavon ella regiun. Nies secretari da taglia ei oz occupaus per 100% e taxescha sper differentas incaricas (p.ex. taglias specialas, taxas turisticas) il pensum maximal dad 80 %.

Cussegl:

Cto. 0290.3144.00 Manteniment; igl ascensur da scala en casa communal duess ins spustar da baghegiar en. Quei en vesta dils cuosts da corona. Ins ha mai udiu che quei fuss in grond basegns.

In ascensur da scala exista en halla Cons. Quel vegn mai duvraus e savess vegnir installaus en casa communal.

Gerau Wendelin Jacomet:

La summa dil budget cumpeggia era la sanaziun dil tschabergal dalla scala. Quel ei buca tenor la norma SIA, baghegiaus avon biars onns e sto vegnir remplazzaus per garantir la segirtad. In accident vegness alla vischnaunca zun cars. Cun far la sligaziun da segirtad vegn l'installaziun digl ascensur da scala pli favoreivla che da far quella pli tard. La segirtad ha prioritad, la scala ha las normas pretendidas.

Igl ascensur existent en halla Cons sa buca vegnir duvraus per la casa communal.

Cussegl:

Ei sedamonda schebein il cussegl vul dar anavos il preventiv alla suprastanza cun l'incarica da scursanir las expensas sin ina cefra definida ni far vinavon conto tier conto. Quei fuss ina varianta beinvegnida senza far proposta.

Il conto 1110 Polizia communal; dat ei buca ina midada cun installar uras da parcar?

President communal Robert Cajacob:

Il concept da parcadis preveda sco emprem l'installaziun d'uras da parcar sigl areal Acla da Fontauna. Egl emprem pass sto ei vegnir rimnau experientschas. Igl ei da far controllas che generesch cuosts. Il cussegl sto decider sur dall'installaziun dallas uras.

Cussegl:

Sto quei esser las uras las pli caras che porschan in pagament cun muneida, cun carta da credit e cun sistem da telefonin? El temps present savess ins pretender da tuts che van cun auto da saver pagar ils parcadis sin moda electronica.

Rubrica pumpiers; fuss ei buca prudent da far in conto separau per il tscheins dils locals da pumpiers? Tgei munta igl augment da cuosts?

Gerau Wendelin Jacomet:

Nus astgein buca desister d'uras da parcar senza muneida. Per bia buca mintgin da tuttas generaziuns (cunzun nos seniors) sa e vul da present applicar ils novs systems da pagar.

Gerau Victor Flepp:

Egl onn proxim eis ei necessari da comprar 30 novas monduras, en tut expensas da frs. 90'000.--. Las pauschalas vegnan adattadas leusuenter. La proposta da cunvegna da repartiziun dils cuosts denter las vischnauncas ei buca vegnida acceptada dalla vischnaunca da Medel.

Ils pumpiers meinan ella corporaziun in quen e preventiv separau e per sesez. Perquei fa in niev conto el menaschi communal buca senn.

Cussegl:

Quei ha la consequenza da dar duas variantas da reparter ils cuosts dil corp da pumpiers. Ina cun la vischnaunca da Medel, l'autra la repartiziun mo denter Mustér e Tujetsch.

Gerau Victor Flepp:

La situaziun actuala munta da menar il quen sco tochen da cheu. Igl uffeci cantunal ha era plaid en caussa. Nus stuein far novas contractivas.

Cussegl:

Cto. 2192.3130.00 Transports da scola; ei igl alzament dils cuosts da declarar muort il niev bus per ils affons da Segnas? Va il bus da scola era sur Cavardiras?

Geraua Jris Lombris:

Nus vein giu discussiuns en connex cun ils transports da scolars cun Ignaz Furger. Las purschidas dalla firma ein favoreivlas. Il cantun paga per scolar e kilometer che quels van e quella part ei ida anavos. Segnas drova in secund bus che cuosta dapli. Sch'ei mida egl avegnir la firma da transport drova ei novas contractivas.

President communal Robert Cajacob:

Era sche Cavardiras ha negins scolars havein nus en suprastanza taxau ei sco survetsch pils indigens e hosps. La differenza da cuosts per schar ir il bus direct a Pardomat ei minimala.

Cussegl:

Il preventiv Center da sport e cultura; igl alzament dils cuosts e dallas entradas per il glatsch ein buca plausibels.

Cto. 3411.3940.00 Tscheins intern; daco ei la summa pli aulta ch'ils davos onns?

Gerau Clemens Berther:

Ei dat d'ina vart in'adattaziun dallas pagas e da l'otra vart ein las uras da preparar e far glatsch pli aultas. Cheutras vegn la clav da repartiziun dils cuosts da personal adattada.

Il project da sanaziun dil CSC effectuescha igl augment dalla summa.

Cussegl:

Cto. 4110.3612.00 Contribuziun Spital regiunal Surselva; cusseglier Edgar Durschei: igl alzament dils cuosts per igl onn current, caschunai dil coronavirus e pagai egl onn vegnent, ston vegnir integrai el preventiv 2021.

**Proposta d'alzar l'expensa sil conto 4110.3612.00 sin frs. 132'000.--.**

**Decisiun:**

**Il cussegl decida senza cuntervuschs ed abstenziuns d'alzar l'expensa dalla contribuziun Spital regiunal Surselva sin frs. 132'000.--.**

Cussegl:

Cto. 5720.4631.00 Contribuziuns cantunalas; pertgei figureschan neginas entradas sin quei conto?

Canzlist communal Andri Hendry:

Cheu setracta ei da contribuziuns per fugitivs domiciliai a Mustér excl. ils requirents d'asil el center da transit Bellavista. Cura ch'il preventiv ei vegnius preparaus eran negins fugitivs domiciliai a Mustér. Sch'ei dat dimoras per fugitivs egl onn vegnent savein nus buc. Nus quintein buc cun contribuziuns e perquei ein era ils cuosts per susteniments vegni reduci (cto. 5720.3637.00).

Cussegl:

Cto. 6150.3111.02 Uras da parcar; sin quei conto ei buca previu expensas, pertgei?

Vegnan uras da parcar cudischadas el quen d'investiziun?

Gerau Wendelin Jacomet:

Las uras da parcar ein planisadas el concept. Era uras existentas vegnan midadas el concept. Quel sto vegnir lubius dil cussegl.

Il quen d'investiziun preveda frs. 70'000.-- per 2021 e frs. 250'000.-- igl onn proxim.

President communal Robert Cajacob:

Igl ei urgent da tschentiar cheu el CSC uras da parcar sin la stagiun vegnenta per contonscher in uorden entuorn las pendicularas. L'investiziun stat en cumpetenza dalla suprastanza.

Cussegl:

Cto. 6150.3141.00 Manteniment da vias; en vesta dils donns da malaura duess ins buca far tuttas lavurs da manteniment dallas vias. Ei füss da cumpensar quels cuosts cul manteniment dils donns.

A vesta dalla gronda summa setracta ei da tgei detagls? Van quellas expensas buca el quen d'investiziun?

Gerau Wendelin Jacomet:

Nus spustein manteniments dapi il 2014. Nus fagein quei che fa il pli basegns. Sminuir fa buca senn. Sche las vias cantunalas vegnan sanadas stuein nus era sanar las communalas ch'ei leu cumpigliadas.

Ei setracta mo da vias communalas nua che cuvridas finas ston vegnir fatgas.

Cussegl:

Per il quen da sanaziuns e renovaziuns stuess ei dar in concept che preveda da saver spustar lavurs en onns extraordinaris. Ei vala da far il pass suenter la comba. Fa ei senn da far cuvrida cun catram fin?

Cto. 6220.3612.00 Contribuziun al traffic public Regiun Surselva; pertgei dat ei cheu in augment dils cuosts?

Gerau Wendelin Jacomet:

Nus lein schar cursar in cuors dil bus da Mustér tochen Biasca senza midada. Plinavon ston las fermadas dil bus local esser adattadas pigl access d'impedi. Il cantun conceda contribuziuns persunter. La lavur sto esser exequida entochen 2023.

Cussegl:

Cto. 6190.31360.01 Lavurs da tiarzas personas; da tgei setracta l'expensa?

Gerau Clemens Berther:

Il menaschi tecnic drova per part specialists per lavurs ni ch'el engascha per in cuort temps luvriers d'autras vischnaucas per lavurs urgentas. Quei sa variar ed era dar entradas.

Cto. 7420 Lavineras; ils donns da SIS da malauras 2020 tier las lavineras ein frs. 275'000.-- tenor l'annunzia dil forester. La part dil cantun ei 75% dalla summa.

Cusseglhier Christian Loretz fa suandonta proposta:

**Prender si las summas els contos suandonts:**

**7420.3811.00 Donns da malaura 2020 (LV Clavaniev) cuosts frs. 275'000.--**

**7420.4861.00 Donns da malaura 2020 (LV Clavaniev) recavs frs. 206'250.--**

**Decisiun:**

**Il cussegl decida senza cuntervuschs ed abstenziuns da crear ils dus contos e prender si las summas el preventiv communal 2021.**

Cussegl:

Cto. 7301.3160.00 Tscheins d'affittaziun; pertgei survegnan personas privatas tscheins d'affittaziun?

Gerau Victor Flepp:

Differentas personas privatas mettan a disposiziun terren per tschentar suschnas e moloks per la rimnada da rumien. Persunter obtegnan ellas in tscheins annual d'affittaziun.

Cussegl:

Cto. 7301.3130.05 Lavur da deponias; frs. 60'000.—e

Cto. 7300.5043.00 (quen d'investiziun) Deponias; setracta la summa da frs. 100'000.-- per la deponia Brulf?

Gerau Victor Flepp:

Il project da sanaziun dalla deponia Brulf ei dotaus cun frs. 300'000.--. La deponia Truatscha cun frs. 60'000.--. Schebein la sanaziun vegn fatga savein nus buc. Il cantun metta peisa sin ina sanaziun.

Cusseglier Edgar Durschei:

Cto. 7301.3130.05: Lavur vid deponias; sin quella posiziun ei pia indicau reservas. Las lavurs ston buca vegnir fatgas l'auter onn. **El propona da sminuir la summa da frs. 60'000.--sin frs. 15'000.--.**

**Decisiun:**

**Il cussegl decida senza cuntervuschs ed abstenziuns da reducir ils cuosts previ sil cto. 7201.3130.05 da frs. 60'000.-- giu sin frs. 15'000.--.**

Gerau Clemens Berther:

Cto 8205 Vias d'uaul; ils donns da malaura vid las vias d'uaul tenor SIE vegnan documentai cun cuosts da frs. 775'000.--. La part dil cantun ei 70%.

Cussegl:

La proposta senumna:

**Prender si las summas els suandonts contos:**

**8205.3811.00 Donns da malauras 2020 cuosts frs. 775'000.--**

**8205.4861.00 Donns da malauras 2020 recavs frs. 542'500.--**

**Decisiun:**

**Il cussegl decida senza cuntervuschs ed abstenziuns da crear ils dus contos e prender si las summas el preventiv communal 2021.**

Cussegl:

Cto. 8250.3130.00 Plan da menaschi; da tgei settracta il plan e paga il cantun enzatgei vidlunder?

Gerau Clemens Berther:

Il cantun pretenda il plan da menaschi digl uffeci forestal. Quei plan sto cuzzar 15 onns. Pli baul haveva quel in cuoz da 25 onns. Il concept intern vegn calculaus cun frs. 60'000.-- per onn e va dus onns. Il bostger cun siu praticant e substitut fan la lavur cheutras vegn ei pli favoreivla che da dar quella extern.

Cussegl:

Sch'ei settracta d'ina lavur interna dat ella buca cuosts effectivs che san vegnir reparti sin auters departements. Cun la calculaziun da lavur interna cun frs. 115.-- per ura ei ina reserva calculada lien. Ei quella calculaziun dalla tariffa enconuschenta?

President communal Robert Cajacob:

Il bostger calculescha cun la tariffa d'in luvrer d'ordlunder.

Cussegl:

Tgi incassescha las taglias per habitonts cun dimora jamnila?

Canzlist communal Andri Hendry:

Tier dimorants dall'jamna che han il domicil principal en in'otra vischnaunca Grischuna vegn la taglia communal partida miez e miez. Quels che han lur domicil principal ordeifer il cantun Grischun pagan negina taglia communal el liug ch'els ein annunziat sco dimorants dall'jamna.

Cussegl:

Cto. 9100.4021.00 Taglia sin schischom; ord tgei raschun pren la summa da quella taglia giu? Ein ils objects novs a S. Catrina gia taxai da niev?

Canzlist communal Andri Hendry:

Per la calculaziun dalla taglia sin schischom ei vegniu sebasau sin las cefras tenor il quen 2019 ed il stan actual el quen 2020. La taxaziun dils proprietaris da secundas habitaziuns era la fin 2019 en retard. Quei sa haver in effect sin las entradas el quen digl onn proxim. Ils objects novs dil Catrina Resort ein aunc buca schazegiai. Quei duess succeder tochen la fin digl onn. La taxa da turissem ei era aunc pendent.

Cussegl:

Quen d'investiziun, cto. 1500.5060.01 vehichels da pumpiers; daco paga Medel sulet frs. 5'000.-- e la gronda summa pagan las duas vischnaucas Mustér e Tujetsch? La repartiziun ei buca eguala per las vischnaucas, quella fuss 1/3 per ina. Tenor messadi finanziescha Mustér dabia infrastruttura per autras vischnaucas. Igl ei da decider da visar il contract cun la vischnaunca da Medel. Drova la suprastanza per quei ina decisiun dil cussegl?

Gerau Victor Flepp:

Il cussegl ha raschun. Ussa vala il contract existent ch'engraviescha las vischnaucas grondas. Medel accepta buca cuosts pli aults. La sligiazion cun in niev contract era sin meisa. Il contract ei suttascrets dalla regenza. Medel savess buca far sur sesez in corp da pumpiers. Il credit per igl auto cistiarna ei ina prefinanziaziun da Mustér e Tujetsch.

Cussegl:

***Il cussegl fa la proposta da sustener la suprastanza d'abdicar il contract dil corp da pumpiers cun la vischnaunca da Medel.***

**Decisiun:**

***Il cussegl decida senza cuntervuschs ed abstenziuns da sustener la suprastanza communal d'abdicar il contract dil corp da pumpiers Sursassiala alla vischnaunca da Medel.***

Cussegl:

Cto. 6150.5010.12 Project center dil vitg; da tgei tracta il project che preveda cuosts da frs. 280'000.--?

Ei tonscha da far las sdremas da trapassar la via, ins sto buca far dapli.

Gerau Wendelin Jacomet:

Ei pertucca igl object Nani Bazar che nus vulein dismetter. Davostier drova ei in mir da sustegn. Quel pertucca era la parcella dalla Claustra e dalla casa Postigliun. Las contractivas cun ils dus possessurs ein buca liquidadas. La varianta minimala cuosta rodund frs. 80'000.--.

Ei dat aunc in passapei en pliras variantas.

Cussegl:

Cto. 6370.01 Ei il perimeter Via Sogn Gions incassaus?

Gerau Wendelin Jacomet:

Gie, la Via Sogn Gions ei terminada.

Cussegl:

Cto. 6150.5030.04 Concepziun parcadis; dess ei buca ina via pli semplia per las uras da parcar? Quellas duessan esser cumpatiblas sulet da pagar cun twint buca aunc per muneida. Quei duess esser sclariu bein e documentau el messadi dil concept.

Gerau Wendelin Jacomet:

Ei dat buca biars systems dad uras. Sulet duas firmas offereschon. Quater uras grondas ni 19 pintgas cuostan frs. 160'000.-- vegn vitier la signalisaziun e l'installaziun. A Trin ei vegniu installau uonn uras da parcar ed en dus meins ei vegniu incassau sur frs. 53'000.-- vitier ei vegniu frs. 8'500.-- per cartas e castitgs. Tut ei mess a disposiziun dalla vischnaunca e las uras san incassar cun twint e muneida. Nies concept detagliu preveda d'installar medemas uras.

Cussegl:

Cto. 7201.5032.22.02 Canalisaziun Acletta: Dislocaziun entras casa da parcar; setracta ei cheu dalla part veglia ni gia la nova? Cheu duess ins spitgar giu tochen che la casa da parcar vegn baghegiada.

Gerau Victor Flepp:

Da tgei canalisaziun ch'ei setracta stuein nus aunc sclarir. La summa ei nudada sco reserva.

Cussegl:

Cto. 8110.6310.00 Contribuziuns meglieraziun funsila; daco ei buc in'entrada sin quei conto?

Canzlist communal Andri Hendry:

El quen 2019 ein ils cuosts pil project dalla meglieraziun funsila vegni engrevegiai al quen separau dalla meglieraziun funsila e cudischai sco recav sil conto 8110.6310.00. Quei ei stau in'unica cudischaziun che serepeta buc els proxims quens communal.

Cussegl:

Cto. 8205.5010.01 Via Sars-Brulf; ei quella via buca finida? Daco ei previu aunc frs. 150'000.--.

Gerau Clemens Berther:

Cheu ein lavurs aunc tenidas anavos. 2021 vegn la construcziun finida.

*Controlla da credits:*

Cussegl:

Cto. 6130.5110.01 Via Lucmagn; quei credit digl onn 2015 ei surtratgs per frs. 44'853.--. Cu vegn il project terminaus? Ei il credit supplementar gia vegnius tractaus dalla suprastanza communal?

Gerau Wendelin Jacomet:

Ils 22 da settember 2020 han las contractivas davart igl acquist da terren e da dretgs saviu vegnir terminadas. Las lavurs ein a fin.

Ctos. dil project sper la Via Lucmagn: 6130.5110.01 Via Lucmagn e 7201.5032.02 Canalisaziun Lucmagn; il quen final ei en lavur. In credit supplementar tier quei project ei buca exlaus. La summa definitiva succeda suenter ch'il quen final ei avon maun e las lavurs repartidas sin ils differents projects. La vischnaunca sa quintar cheu aunc cun contribuziuns digl Uffeci da construcziun bassa. Ils projects Via Lucmagn san vegnir terminai entochen la fin 2020.

Cussegl:

Cto. 6130.5110.02 Via Acletta; il credit ei surtratgs per frs. 230'418.--. Dat ei cheu ina damonda per in credit supplementar?

Gerau Wendelin Jacomet:

Quei project vegn menaus sut il conto 6130.5110.02 Via Acletta e conto 7410.5020.00 Segirar la Val Acletta. Tenor il messadi dils 27 da november 2016 en cunvegnientscha cun las Pendericaras Mustér SA vid la correctura dalla via, munta la summa davart las

Pendicularas Mustér SA total frs. 740'000.--. Vid la Val Acletta contribueschan las pendicularas la summa da frs. 782'480.--. Entochen oz han las pendicularas contribuìu la summa da frs. 1'000'000.--. Pendent ei la summa da frs. 522'480.--. Ulteriuramein ha il cantun e la confederaziun concediu la summa totala da frs. 2'370'797.--. Da quella summa ein aunc frs. 102'798.65 aviert. Da quei cumpeglian frs. 45'747.-- las fermadas pil bus local. L'intenziun ei da serrar giu il project ed entscheiver l'auter onn cun las amortisaziuns.

Cussegl:

Cto. 6150.5010.03 Via Sogn Placi; credit digl onn 2016. Gl'entir onn puspei iu nuot. Co vesa ei ora cheu?

Gerau Wendelin Jacomet:

La suprastonza communal ha approbau il quen final cun la clav provisoria davart la repartiziun dils cuosts e communicau ei als pertuccai. Ina protesta ei vegnida inoltrada. Actualmein ein ins vidlunder da risponder la protesta. Quella fatschenta duei vegnir terminada cun la fin digl onn 2020.

Cussegl:

6150.5010.04 Via Funs-Dado; credit havess gia giu dad esser sin la controlla digl onn 2019. Credit ei vegnius sancziunaus ils 7 da zercladur 2019.

Gerau Wendelin Jacomet:

Tenor il credit concediu muntan ils cuosts bruts per la Via Funs-Dado a frs. 317'000.--. Actualmein ei vegniu cudischau expensas da frs. 135'112.-- (2020) per la Via Funs-Dado, cto 6150.5010.04. Per la Via Run frs. 334'452.-- (2019 e 2020) cto 6150.5010.00. La construcziun dallas vias entochen las lavurs vid la cuvrída ein terminadas. Quellas succedan proximamein. La stad 2021 ei la cuvrída fina previda. L'entschatta dall'jamna proxima vegnan ils emprems acontos spedi. La survesta dils cuosts ei aunc buca avon maun. Tenor mia retscherca dad oz figurava il credit cto. 6150.5010.04 buca sin la gliesta da controlla igl onn 2019.

Canzlist communal Andri Hendry:

Damai ch'ei era buca succedi el quen 2019 expensas ed entradas en connex cun la Via Funs-Dado, figurava quei credit buca sin la gliesta da controlla da credits digl onn 2019. Egl avegnir vegnan ils credits concedi integrai ella controlla da credits, quei era sch'igl ei aunc buca vegniu entschiet cun la realisaziun dil project.

Gerau Wendelin Jacomet:

Cto. 6150.5030.02 Parcadi Mumpé Tujetsch; las lavurs han saviu vegnir cumbinadas cun la meglieraziun funsila. Il credit concediu munta a frs. 31'500.--. Ils cuosts per la meglieraziun funsila ein succedi e las lavurs han saviu vegnir terminadas. La summa da frs. 20'173.45 duess buca vegnir survargada.

President communal Robert Cajacob:

Il project d'ennevar dallas pendicularas survegn dalla vischnaunca 2 milliuns francs. Per mintg'etappa eregida frs. 500'000.--. Uonn ei il lag da rimnada per aua da far neiv a Caischedra vegnius erigius, aschia san las pendicularas clamar giu ina rata. Da l'autra vart separticipeschan las pendicularas cun ina cumpart dils cuosts dalla correctura dalla via cantunala e dil neiv uor da protecziun Val Acletta. Quei project ei termina e cul quen final sa la vischnaunca era tschentar il quen persuenter. Igl ei previu da scuntrar ils dus quens in cun l'auter.

Gerau Victor Flepp:

Cto. 7201.5042.00 Serenera Raveras; per la sanaziun dalla serenera dat ei oz novas enonuschientschas da systems dalla biologia. Quels vegnan a sminuir ils cuosts per la sanaziun considerablamein.

**Decisiun:**

**Il cussegl decida senza cuntervuschs ed abstenziuns;**

- 1. d'approbar il preventiv 2021 cun suttametter quel al referendum facultativ conform ad art. 21, lit. a dalla costituziun communal;**
- 2. da fixar per 2021 il pei da taglia sin las entradas e la facultad sin 120% dalla taglia cantunala ed il pei da taglia sin schischom ad 1,7 %0 (sco tochen dacheu).**

Cussegl:

La cumissiun ch'examinescha la deducziun dil pei da taglia desista da far proposta per in auter pei da taglia. Per il proxim quen duess la proposta vegnir fatga.

Cussegl da vischnaunca Disentis/Mustér  
Il president: Igl actuar:

Mario Flepp

Paul Duff

**Informaziun:**

Gerau Clemens Berther:

In'informaziun pertuccont ils proxims pass da baghegiar per l'emprema etappa dil Center Fontauna.

Il giurist dr. Reto Cramer ha sclariu per la cumissiun da baghegiar la procedura per la realisaziun dil project Center Fontauna:

Tenor la lescha da submittiun (art. 14 SubG) astgan ils architects huonder bisquolm preparar il project Center Fontauna mo tochen e cun la lubientscha da baghegiar. Per las lavurs che suonan, la planisaziun en detagl, la survigilonza, la cumparegliaziun d'offertas, la proposta da surdadas da lavur sco era l'execuziun e realisaziun dil project Center Fontauna per l'emprema etappa vegn surdau ad in niev biro d'architectura e planisaziun tenor ils criteris numnai. La consequenza ei che nus sperdin temps da baghegiar. Denton fagein nus sbagls formals sa quei purtar consequenzas fatalas entochen tier ina procedura giudiziala.

Cussegl da vischnaunca Disentis/Mustér  
Il president: Igl actuar:

Mario Flepp

Paul Duff

Disentis/Mustér, ils 27 da november 2020